

Hues no ta haya proba labamento di placa  
**HOMBER MESTER HAYA BEK  
MAS CU 18 MIL DOLLAR CU  
DOUANE A CONFISCA**



**WWW.SOLODIPUEBLO.COM**



**SOLODIPUEBLO@GMAIL.COM**

**TUR COS TA MUSTRA CU BENNY  
LEONCITA Y SUSSEBEEK LO PIDI  
GRATIE DENTRO DI 9 DIA NA  
MINISTER DOWERS, SEGUN OM**



**AVP A PIDI  
PRIVACIDAD;  
NO A CONDENA  
NI DISTANCIA  
DI SEVINGER**

Parlamentario Shailiny Tromp-Lee:  
**AVP TA MALINFORMA PUEBLO  
PA PROBECHO POLITICO;  
RAPPORT DI ARA TA UN LES  
DI CRISIS, NO PRUEBA DI  
CORUPCION**





# PARLAMENTARIO XIOMARA MADURO TABATA PRESENTE NA “THANK YOU EVENT” DI SMAC



Diasabra anochi, Parlamentario Xiomara Maduro tabata presente na e “Thank You Event” di SMAC, unda el a ricibi un reconocimiento pa e sosten cu Gabinete Wever-Croes a brinda na SMAC y Carnaval di Aruba.

Maduro a destaca cu “cultura bo mester bib’e” y pesey, tanto como ex-Minister di Cultura y awor como Parlamentario, e ta sigui comprometi pa apoya y celebra Carnaval di Aruba.

Parlamentario Maduro ta gradici Presidente di SMAC, sr. Darren van Ommeren y henter ekipo di SMAC pa nan esfuerso y dedicacion, cu a haci Carnaval di Aruba un gran exito.


## PROME ENTRENAMIENTO PA TEAMARU SU EKIPO DI GIMNASIA TA UN REALIDAD

Despues di a yega na Panama pa e Weganan Suramericano di Hubentud ayera mainta, atleta di TEAMARU Malaky van Dinter hunto cu entrenador Jimmy Palma a bay “Complejo Deportivo Irving Saladino” pa asina haci nan prome entrenamiento di Gimnasia Artistica na Panama2026.

bin directo di Bogota-Colombia, unda a haci un campo di entrenamiento di varios siman pa asina tin e miho preparacion posibel pa nan participacion nan e Weganan aki di Panama2026.

#TEAMARU #COA  
#ARUBA #PANAMA2026

Malaky y Jimmy a





# AVP A PIDI PRIVACIDAD; NO A CONDENA NI DISTANCIA DI SEVINGER

Tin hopi critica riba declaracion di AVP: falta condena cla y distancia politico

Oranjestad – E declaracion oficial di AVP tocante e sentencia den e caso Avestruz contra Benny Sevinger a genera critica, pa motibo cu segun diferente opinionnan, e partido no a muestra un posicion cla di condena ni tampoco no a tuma distancia di e hecho grave cu a wordo sentencia.

Den nan comunicado, AVP ta bisa cu nan “a tuma nota” di e sentencia y cu nan ta reconoce e independencia di e sistema hudicial. Tambe nan a pidi pa respeta privacidad di famia Sevinger den e momento dificil aki. Pero pa hopi hende, esaki no ta corecto.

E punto principal di critica ta cu, na ningun momento AVP no a bisa claramente cu nan ta condena loke a pasa.

Tampoco nan no a comunica cu nan ta tuma distancia politico y moral di Benny Sevinger.

En bes di esey, e enfasis principal di e comunicado tabata riba privacidad di famia y riba otro procesonan hudicial cu ainda ta pendiente.

Segun e critica, un partido politico cu ta papia di transparencia, integridad y bon gobernacion mester a expresa sin confusion cu un condena di corrupcion of actonan serio no ta representa e balornan cu nan partido ta para pe. E argumento ta cu



no por simplemente pidi privacidad y sigui dilanti, manera cu nada no a pasa.

Observadornan ta bisa cu AVP tabatin e obligacion politico pa manda un mensahe contundente: cu

nan ta rechasa e hecho, cu nan ta condene y cu nan ta tuma distancia di cualkier conducta cu por afecta confianza publico den e partido. Segun nan, un condena asina lo tabata un paso necesario pa muestra

liderazgo y coherencia.

Te awor, e declaracion oficial di AVP a wordo mira pa algun hende como un reaccion cu ta evita pa confronta directamente e gravedad di e situacion.

## SETAR TA ORGUYOSO DI CONTINUA CU SU PARTNERSHIP CU BEYOND SPORTS LIMIT FOUNDATION PROMOVRIENDO DEPORTE INCLUSIVO

SETAR ta orguyoso pa anuncia continuidad di su partnership cu Beyond Sports Limit Foundation, reafirmando nos compromiso pa sostene iniciativanan cu ta haci deporte mas accesibel y inclusivo pa personanan cu limitacion.

Desde su fundacion na 2022, SETAR a sostene y mira con e fundacion a crece di un idea pa un movimiento cu awo ta impacta decenas di bida positivamente. E fundacion continuamente ta sigui crea oportunidadnan unico pa personanan cu limitacion por participa activamente den

deporte, sea den eventonan local of internacional, mientras cu ta sigui empodera, inspira y kibra bareranan den e comunidad deportivo.

Como nos compania nacional di telecomunicacion, nos ta kere den conecta hende no solamente digitalmente, pero tambe por medio di oportunidad, inclusion y progreso.







# NoticiadiCorte

## Hues no ta haya proba labamento di placa

# HOMBER MESTER HAYA BEK MAS CU 18 MIL DOLLAR CU DOUANE A CONFISCA

ORANJESTAD – E homber Colombiano biba na Aruba, P.C. (40), a presenta dilanti Hues pa e caso penal cu Ministerio Publico a cuminsa contra dje.

Fiscal ta acusa P.C. di no a declara suma grandi na Douane y tambe ta acusa P.C. di labamento di placa.

SOLO DI PUEBLO por a compronde cu Hues no ta haya proba cu P.C. a laba placa y a declar'e liber. Hues a ordena pa P.C. haya su placa bek y un multa di 20 mil florin pa no a declara suma grandi na Douane.

### NO A DECLARA PLACA NA DOUANE

E acusacion cu Fiscal a presenta contra P.C. ta cu riba 9 November 2024, P.C. no a declara mas cu 18 mil dollar na Douane y ta acusa P.C. di labamento di placa.

### MAS DI 18 MIL DOLLAR CONFISCA

Ta asina cu Douane a constata cu un dama lo tabatin mas placa scondi y a haci investigacion. E dama a bisa cu el a haci e homber P.C. fabor di hiba placa Colombia. Douane a haya mas cu 18 mil dollar scondi den paña y den un bleki. E dama a bisa cu 700 dollar ta di dje y e resto ta di P.C. E placa aki a keda confisca. Durante tratamiento di e caso den Corte, P.C. a bisa Hues cu e no a declara e cantidad di placa na Douane door cu e momento ey e tabata ilegal na Aruba. El a bisa cu promer e tabata kier a manda e placa via lugar di manda placa pero e cantidad ta mucho mas cu ta permiti. El a bisa cu e dama ta un familiar cu a haci'e un fabor pa hiba e placa. Hues a puntr'e cuanto el a paga e dama. El a bisa cu e no a paga e dama pa haci e fabor.

Hues a bisa cu P.C. a declara na Polis cu e placa el a gana trahando riba autonan aki na Aruba. El a splica Polis cu el a bende su auto y otro cosnan na Colombia pa asina bin Aruba. El a bin Aruba cu 5 mil dollar. Segun P.C. e placa

cu e kier a manda Colombia tabata pa paga riba tereno cu e tabata atrasa den paga. Hues a bisa cu Polis a haci investigacion y algun hende a bisa cu nan a paga P.C. y algun a bisa cu nunca a tende P.C. Investigacion ta muestra cu P.C. lo a gana 1100 florin y kitando gastonan lo a resta 600 florin. P.C. a bisa Hues cu e ta haci negoshi di Crypto na Merca y ta gana 2 mil dollar pa luna. El a bisa cu actual e ta inscribi na Aruba y ta trahando pa un compania. Fiscal a cuestiona e hecho cu P.C. no a paga belasting. P.C. a bisa Hues cu awor cu e ta legal e ta haciendo e areglonan pa paga belasting di loke el a traha.

### FISCAL A EXIGI CASTIGO Y PA E PLACA KEDA CONFISCA

Fiscal a bisa Hues cu P.C. no a declara placa na Douane. E dama a sconde e placa den su paña y den un bleki. Fiscal a muestra cu P.C. a declara na Polis cu e placa ta di dje. E placa tabata mas cu por viaha cune sin declara na Douane. Fiscal ta haya legalmente proba labamento di placa. El a muestra cu P.C. tabata trahando ilegal y a gana masha hopi placa y no a paga belasting. Esaki ta un hecho castigabel. Fiscal a sigui bisa cu P.C. a cambia e placanan na dollars y a duna e dama pa hiba Colombia. Fiscal a exige pa e placa keda confisca y 2 luna di prison condicional cu un tempo di prueba 2 aña pa P.C.

### ABOGADO TA CUESTIONA CU NO POR CONFISCA PLACA

Abogado mr. Rosenstand a remarca cu P.C. no tabata ilegal sino no documenta. E tabata traha y cobra placa pero e no a viola Belasting. 18.400 dollar y mas placa a wordo haya riba e dama. Abogado ta haya cu e hecho cu no a declara cuanto placa ta bay cun'e, no ta un violacion of acto criminal. E abogado a bisa Hues cu P.C. ta admiti cu no a declara e placa ora di viaha. Na opinion di abogado, e hecho cu no a declara e placa, no por wordo considera un hecho criminal. P.C. a bisa cu e placa tabata pa paga tereno cu a cumpra na Colombia. E

abogado no ta haya cu por confisca e placa sin mas. Na opinion di mr. Rosenstand, no por papia aki di labamento di placa pasobra e placa no ta precedente di fuentenan criminal. No por muestra cu e placa ta precedente di fuente criminal. El a muestra cu P.C. a duna splicacion bon cla di e fuente for di unda el a haya e placa y pa kico e placa tabata destina. E abogado a bisa cu P.C. a splica cu el a bende un auto na Colombia y a bin cu 4 mil dollar Aruba. El a keda cu e placa aki y a traha riba electricidad di autonan na Aruba y a splica su entrada. Tin testigonan a declara cu P.C. a traha riba nan auto y a paga. Na opinion di mr. Rosenstand, no tin indicacion cu P.C. ta liga cu fuente criminal. No tin ningun acusacion di lo ta involvi den droga. No tin ningun indicacion cu e placa ta di fuente ilegal. Abogado ta haya cu mester declara P.C. liber di labamento di placa y e placa mester wordo debilbe.

### SENTENCIA

Hues a bay evalua un rato y a dicta sentencia di biaha. Hues a bisa cu P.C. ta wordo acusa di no a declara placa cu kier a hiba exterior. Hues ta considera esaki un hecho castigabel. E acusacion di labamento di placa ta considera placa haya for di fuentenan criminal. Hues ta haya cu tabatin sospecho mirando e forma con kier a saca e placa for di Aruba. Hues a bisa cu P.C. a declara con el a yega na e placanan door di traha riba electronica di auto. Hues ta haya cu Fiscal no por prueba cu tabatin labamento di placa. Tambe Hues ta haya cu Fiscal ta bisa cu P.C. no a paga belasting pero ta Fiscal mester demostra esey. Hues a declara P.C. liber di labamento di placa. Pa no a declara placa cu kier a hiba for di Aruba, Hues a impone un boet di 20 mil florin. Hues a ordena pa P.C. haya su placa bek. Fiscal a propone cu lo por desconta e 20 mil florin for di e placa cu mester debilbe P.C. Abogado mr. Rosenstand a papia un rato cu P.C. y a bisa Hues cu P.C. ta di acuerdo y no lo apela. Fiscal a bisa Hues cu e ta bay pensa.



# TUR COS TA MUSTRA CU BENNY LEONCITA Y SUSSEBEEK LO PIDI GRATIE DENTRO DI 9 DIA NA MINISTER DOWERS, SEGUN OM

ORANJESTAD – Segun informacion comparti pa e medio di Noticia Cla, Ministerio Publico (OM) a confirma cu despues di e decision definitivo di Hoge Raad den e caso Avestruz, tin un periodo obligatorio di 9 dia di pausa prome cu e ehecucion di e castigonan di prizon tuma lugar.

Durante e nueve dlanan aki, e condenadonan, Benny Sevinger, Leoncita Arends y Pieter Sussebeek tin e posibilidad legal pa presenta un peticion di gratie na Arthur Dowers. Pe motibo aki Ministerio Publico tin cu pausa e ehecucion cu 9 dia.

Kico ta gratie? Gratie ta pordon di castigo, o sea pa no sinta castigo di prizon.

Loke ta hala atencion ta cu pa gran parti di comunidad

e proceso aki ta algo nobo y practicamente desconoci. Nunca prome e publico tabata asina consciente cu incluso despues di un sentencia final di e corte mas halto, ainda tin un “porta legal” habri pa intenta na evita, evadi, of modifica un castigo via un peticion di gratie.

Segun fuentenan cerca di e condenadonan, ya tin un intencion cla pa uza e oportunidad aki. Nan lo presenta un peticion formal di gratie na e Minister di Husticia. Esaki tabata wordo papia for di promer cu e sentencia a cay.

E desaroyo aki ta pone un pregunta clave riba mesa: Minister lo tin e ultimo palabra den e caso aki? Y mas importante ainda: E tin e poder pa den practica



hala un decision hudicial un banda dor di otorga gratie?

Legalmente gratie ta un instrumento extraordinario cu por reduci, cambia of hasta elimina un castigo, pero su aplicacion ta semper un tema delicado, specialmente den un caso di tanto impacto publico

manera Avestruz.

Cu e informacion oficial di Ministerio Publico via Noticia Cla, e caso ta drenta un fase completamente nobo. Loke tabata un proceso puramente hudicial, awor ta bira un decision cu tin tambe un dimension politico y administrativo. Pueblo ta siguiendo e situacion

cu hopi atencion pa mira con esaki lo desaroya o termina. Sin duda esaki ta e siguiente capitulo den e novela di corrupcion cu a marca Aruba y tur bista awor ta riba e decision cu lo wordo tuma den e dlanan venidero. Algun lo interpreta esaki cu nan ta purba sea como sea pa “get away”.

## ARUBA BANK TA LANSA SU CAMPAÑA DI STUDIANTE 2026: “JUST LIKE THAT!”

Oranjestad – 15 di april 2026 – Nos ta orguyoso di presenta nos campaña nobo: “Just Like That!”, un iniciativa cu ta stimula e hobennan di Aruba pa tuma paso simpel pa nan futuro financiero.

Habri un Cuenta di Estudiante nunca tabata asina facil, ni asina recompensante!

Ki beneficianan tin?

- Aplica facil y liher online
- Chens pa gana premio

Estudiante cu aplica pa un Cuenta di

Estudiante online prome cu 17 di juli 2026, automaticamente ta participa pa gana:

- ☐ Un di 3 premio di AWG 1,000

E ganadornan lo wordo anuncia den e siman di 20 di juli 2026.

Pa mas informacion, bishita: ☐ [www.arubabank.com/student-2026](http://www.arubabank.com/student-2026)

Campaña valido solamente pa cuenta di estudiante nobo.





# ARUBA TOURISM AUTHORITY A RICIBI PREMIO AQUILA WHALESONG DESTINATION DURANTE SEATRADE CRUISE GLOBAL

**E premio ta representa forsa, sabiduria y harmonia cu ta alinia cu vision di Aruba**



Diamars 14 di april, Aruba Tourism Authority (A.T.A.) a wordo honra cu e Aquila Whalesong Destination Award, presenta door di e Aquila Center for Cruise Excellence durante Seatrade Cruise Global na Miami. E premio ta reconoce e compromiso sobresaliente di Aruba pa excelencia den desempeño como destinacion crucero, sostenibilidad y inversion a largo plaso den recurso humano.

E premio Whalesong ta representa doordierabodibayenacutasimbolisa forsa, sabiduria y harmonia, balornan cu ta alinea fuertemente cu e vision di Aruba pa un turismo sostenibel. E reconocimiento aki ta resalta e esfuersonan continuo di nos isla pa construi un industria di turismo resiliente cu ta pone enfasis riba proteccion di medio ambiente, bienestar di comunidad y experiencia di bishitante dicalidad halto.

Ademas, e Whalesong Destination Award ta wordo otorga anualmente y ta celebra organisacionnan cu ta muestra un dedicacion consistente na fortalece e experiencia di e bishitante a traves di entrenamiento, colaboracion, iniciativanan di sostenibilidad y involucracion di comunidad. Aruba awor ta uni

su mes na un grupo distingui di ganadonan anterior, incluyendo ProColombia, cu a ricibi e premio na 2025.

“E Aquila Whalesong Award ta representa nos aprecio profundo pa organisacionnan cu ta inverti no solamente den infraestructura of mercadeo, pero tambe den e recurso humano tras di turismo,” asina Beth Hatt, Fundadora di Aquila Center for Cruise Excellence, a expresa. “Aruba Tourism Authority ta ehempel di e compromiso aki a traves di su enfoke a largo plaso riba desaroyo di hende, sostenibilidad y colaboracion den e sector di turismo.”

Durante casi un decada di colaboracion cu Aquila, Aruba a inverti consistentemente den un rango amplio di programanan di entrenamiento diseña pa eleva e experiencia di crucero y turismo. E iniciativanan aki a inclui entrenamiento den excelencia di servicio pa personalden ‘frontline’, programanan di conscientisacion di destinacion, practicanan di turismo sostenibel y tayernan di fortalecimiento di capacidad pa stakeholdernan di turismo riba henter e isla.

E enfoke continuo riba entrenamiento y desaroyo a fortalece e forsa laboral di turismo di Aruba, a mehora satisfaccion di bishitante y a reafirma e compromiso di nos isla cu un crecimiento di turismo responsabel y sostenibel. A traves di colaboracion estrecho cu comunidadnan local y partnernan di industria, Aruba ta sigui segura cu turismo ta entrega beneficio a largo plaso tanto pa residente y pa bishitante.

E ceremonia di entrega di premio a wordo atendi door lidernan clave di industria, incluyendo Adam Ceserano (Presidente di Florida-Caribbean Cruise Association - FCCA), Michele Paige (CEO di FCCA), Beth Hatt, Melanie Colpitts, Ambra Attus y Danielle Timmons di Aquila Cruise Center for Excellence, Minister di Turismo, Transporte y Labor, mr. Wendrick Cicilia, Philippe LaReine (Chief of Staff Ministerio), Ronella Croes (CEO di A.T.A.), Patrick Melchior (Destination Services Manager di A.T.A.), Monica Bos (Cruise Manager di A.T.A.) y demas representante di A.T.A., Marc Figaroa (CEO di APA N.V.), Mario Arends (Commercial Manager di APA N.V.) y demas representantenan di APA N.V.

Minister Cicilia a expresa gratitud y a subraya e compromiso cu esaki ta muestra cu nos socionan local y internacional den e mundo di turismo, den e caso aki cu entre otro Aquila Center for Cruise Excellence & Florida-Caribbean Cruise Association. El a garantiza cu esfuerso lo sigui ta enfoca riba excelencia y riba eleva e experiencia



pa tur cu ta dicidi di bishita.

Ronella Croes a acepta e premio den nomber di A.T.A. expresando: “Nos ta profundamente honra di por a ricibi e Aquila Whalesong Destination Award. E reconocimiento aki ta refleha e dedicacion di henter nos sector di turismo y nos compromiso comparti cu excelencia, sostenibilidad y desaroyo continuo. Invirtiendo den nos hendenan a traves di entrenamiento y colaboracion, nos ta garantiza cu Aruba lo sigui ta un destinacion caluroso, hospitalario y responsabel pa tur hende cu ta bishita.”

Tocante Aquila Center for Cruise Excellence

Cu mas di 40 aña di experiencia, Aquila Center for Cruise Excellence ta un lider global di confiansa den entrenamiento di turismo y desaroyo di destinacion. Como e partner exclusivo di entrenamiento di Florida-Caribbean Cruise Association (FCCA), Aquila ta ofrece programanan adapta pa destinacionnan, operadornan di tour y profesionalnan den ‘frontline’ mundialmente, cu enfoke riba turismo (sostenibel) y excelencia den servicio.



# Parlamentario Shailiny Tromp-Lee: AVP LO A LAGA PUEBLO SUFRI HAMBER PA CUMPLI CU BUROCRACIA!




Parlamentario Drs. Shailiny Tromp-Lee ta lamenta profundamente e nivel di populismo y amnesia politico cu fraccion di AVP ta demostrando ora nan ta trata e Jaarrekening 2020. Den un intento desespera pa mancha e liderazgo di Evelyn Wever-Croes, AVP ta bati riba e falta di "base legal" di FASE na 2020, lubidando cu na e momento ey, Aruba tabata den un guerra contra un virus invisible y un colapso economico total. Tromp-Lee ta papia cla y cu echo: na 2020 Aruba tabata den un crisis sin precedente. Cu 25.000 persona sin trabou den un siman, no tabatin tempo pa sinta warda lunanan largo riba un ley prome cu yuda famianan. E prioridad di Gabinete Wever-Croes

tabata pa e tata y mama di famia por a pone pan riba mesa pa nan famia," Tromp-Lee a declara.

## Hamber of burocracia?

E Parlamentario ta cuestiona seriamente si AVP lo a prefera laga pueblo sufri hamber pa djis cumpli cu un formalismo prome. Pa MEP, e ser humano semper ta bin na prome luga. Tromp-Lee a enfatisa cu e decision principal tabata pa garantisar e bienestar di e ciudadano prome y, posteriormente na aña 2022, a formalisa tur e procesonan legalmente den Parlamento. E paso aki a wordo haci netamente pa garantisar transparencia total y duna e base legal necesario na e yudansa cu a wordo brinda durante e



crisis mundial.

## Falta di Moral: E 'MEGA debe' y PPP

E Parlamentario a hiba un critica fuerte contra e moralidad di AVP pa papia di "debilita estado di derecho", recordando nan e maneho financiero di nan mesun partido. El a señala cu e critica riba e 43 miyon di FASE ta un insulto pa e inteligencia di pueblo, specialmente ora cu AVP mes a laga e pais carga cu un MEGA debe structural y proyectonan PPP irresponsabel. Segun Tromp-Lee, e maneho ey tabata precisamente e motibo pakico e situacion financiero di Aruba tabata asina precario caba prome cu e pandemia a dal.

## Conclusion

Segun e Parlamentario, e intento di AVP pa criminalisa e ayudo di FASE ta simplemente un cortina di huma pa desvia

atencion for di e realidad. El a reafirma cu Aruba a logra sobrevivir e pandemia danki na decisionnan firme cu a keda tuma cu rapidez y curashi. Tromp-Lee a enfatisa cu, mientras AVP ta keda ancla den

pasado buscando erornan administrativo den medio di un crisis mundial, e prioridad di MEP ta y lo keda e bienestar y siguridad di e pueblo Arubano.

## Clasificados



SOLODIPUEBLO@GMAIL.COM  
CEL.585 9500





# PROME INVESTMENT CONFERENCE DI OCT FORUM TA MARCA UN PASO HISTORICO PA INVERSION Y COLABORACION REGIONAL



Oranjestad, Aruba – Ayera mainta, Minister di Finansa, Asunto Economico y Sector Primario, mr. Geoffrey Wever, a habri e Prome Investment Conference, cual a forma parti di e 21st EU-OCT Forum cu a tuma luga na Aruba.

E OCT-EU Investment Conference a convoca e Overseas Countries and Territories (OCT's), Union Europeo y representantenan di Hulanda, Francia y Dinamarca cu e meta pa fortalece dialogo, colaboracion, y traha riba retonan y solucionnan comun. E aña aki, e forum a culmina cu su prome Investment Conference, teni e ultimo dia di e programa — un momento historico pa e territorionan involucra. Den e contexto global actual di geopolitica y geoeconomia, cual ta afecta tur nos islanan y territorionan, e participacion den Global Gateway ta representa

un señal fuerte di e Union Europeo tocante e evolucion di e relacion cu e OCT's, y e potencial cu esaki ta trece den varios area strategico, manera; conectividad maritimo, conectividad digital, energia, maneho di crisis y di desaster y maneho di e reto comun di sargassum.

Hunto, e OCT's ta representa 13 territorionan den Caribe, Pacifico y Artico, cubriendo un area maritimo enorme, ecosistemanan unico di biodiversidad di gran babor, y un riqueza cultural y social significativo pa nan pueblo y pa mundo. Participacion den e Global Gateway programma ta crea un oportunidad nobo pa fondo publico di Union Europeo, fondonan nacional y inversion priva pa proyectonan grandi cu impacto.

Un di e retonan mas grandi cu e OCT's ta enfrenta, ta acceso na fondo pa realiza proyectonan di impacto E



obhetivo di e conferencia aki ta reuni actornan di sector priva, institucionnan di Union Europeo y institucionnan financiero di desaroyo pa defini prioridadnan di inversion, conecta partnernan, y pa transforma proyectonan den accion concreto—permitiendo acceso na mas fondo pa crea y realiza proyectonan cu tin impacto real den comunidadnan. Esaki ta alinea cu direccion strategico nobo di gobierno di Aruba pa diversifica su modelo di inversion, den cuadro cu su disciplina fiscal, incluyendo e desaroyo di un fondo publico multi-anual pa

inversion. Recientemente, Aruba a logra e credit rating mas halto te awor, un rating di 'A-' di Standard & Poor's, fortaleciendo su posicion den mercado internacional.

E potencial pa colaboracion regional entre OCT's ta inmenso. Hunto, e Union Europeo, Estado Miembronan y OCT's por navega oportunidadnan di financiamiento, ofrece apoyo regulatorio, y desaroya iniciativanan regional cu por aborda retonan estructural comparti mientras ta impulsá innovacion y emprendemento.

Minister Wever ta gradici y felicita Comision di Union Europeo, asociacion di OCTA, GOPA, team Aruba, studiantenan di UA pa nan apoyo den e organizacion di e Conferencia como tambe tur participante cu a contribui pa e conferencia por tabata exitoso. Finalmente, alabes Minister Wever a expresa su gratitud na Comision di Union Europeo pa habri e porta pa e OCT nan pa participa activamente den e iniciativa di Global Gateway creando oportunidadnan nobo pa e territorionan.



# IGLESIA ADVENTISTA DI SHETE DIA NA BERNHARDSTRAAT TA MARCA INICIO OFICIAL DI RESTAURACION DI PATRIMONIO Y COMUNIDAD



Durante un ceremonia special cu a tuma luga diamars atardi den Bernhardstraat, a marca un paso importante den proteccion y restauracion di patrimonio religioso na Aruba.

E actividad a reuni representante di gobierno,

comunidad y iglesia pa conmemora e historia di e edificio y celebra e inicio oficial di su proceso di restauracion. Den e marco di e ceremonia, a realiza colocacion di e seyo di monumento protegi y firma di un acuerdo importante pa garantiza e continuidad di e proyecto.



E programa a cuminsa cu un bonbini di Pastor Pablo Lake como maestro di ceremonia, sigui pa un presentacion di e antecedentenan historico di Luciano Milliard. Posteriormente, Calix Ashby a ofrece un bista di e proyecto di restauracion, resaltando e importancia di cooperacion pa haci esaki posibel.

Durante e ceremonia, Pastor Virgil Sams a dirigi su mes na e comunidad, incluyendo un reconocimiento special na Eric Principaal pa su dedicacion y contribucion duradero durante casi tres decada na desaroyo y fortalecimiento di e comunidad di Bernhardstraat.

Prome Minister Mike Eman tambe a hiba palabra, enfatizando e importancia di preserva patrimonio como base di identidad nacional y desaroyo di comunidad.

Un momento simbolico

di e actividad tabata e colocacion di e seyo di monumento protegi, realiza pa Prome Minister Mike Eman hunto cu Pastor Sams y Raul Gei, sigui pa e firma oficial di e acuerdo cu lo guia e proceso di restauracion.

E ceremonia a sigui cu un oracion pa e proyecto y comunidad, lidera pa Pastor Wilson Navarro, y a conclui cu un momento di celebracion.

E iniciativa ta forma parti di un esfuerzo mas amplio pa revitalisa Bernhardstraat. Riba 30 di januari 2026, durante e conferencia di Bon Comun, Stichting Revitalisation Bernhardstraat a wordo estableci oficialmente, como meta busca sosten y cooperacion pa transforma e area den un comunidad mas fuerte y armonioso.

E progreso den Bernhardstraat ta refleha e vision di Bon Comun, promovi pa Prome

Minister Mike Eman, cu ta pone comunidad como prioridad. Cu e creacion di e fundacion, e vision aki a bira accion concreto, enfoca riba cooperacion, renobacion y fortalecimiento di comunidad.

Den e mesun linea, varios iniciativa di embeyecemento realiza, incluyendo pintura di edifisio y cas den e area. Ademá, un mural na honor di musico Arubiano Julio Bernardo Euson inaugura na edifisio Chocolate City na San Nicolas, como parti di celebracionnan nacional di 18 di maart.

Cu e paso aki, Bernhardstraat ta drenta un fase nobo di desaroyo, unda restauracion di patrimonio ta bay man den man cu fortalecimiento di comunidad. E colaboracion entre gobierno, iglesia y comunidad ta muestra cu, ora tin compromiso y vision, cambio positivo ta posibel.



Parlamentario Eduard Pieters (PPA)

# NA DEN HAAG: “PPA TA PARA FIRME CU ARUBA NO MESTER DI HOFA”



Den su prome dia di e reunionnan oficial na Den Haag, parlamentario Eduard Pieters di fraccion di PPA a vocifera un mensahe cla y sin ambigüedad: Aruba no mester di Rijkswet HOFA y nolo acepta debilitacion di su Status Aparte. Durante un encuentro clave cu Don Ceder di ChristenUnie, PPA a presenta su ‘position paper’, exponiendo no solamente e riesgo politico di HOFA, pero tambe su trasfondo: un proceso cu, segun Pieters, ta pusha pa mas di 10 aña door di e ambtenaren na Den Haag, cu e solo meta pa debilita autonomia di Aruba.

## HOFA: No ta coincidencia, sino un proceso di aña

Segun Pieters, e discusion di HOFA no a cuminsa awe. “Tin mas di 10 aña ya tabatin intento pa introduci cualkier instrumento, cu ta limita nos autonomia,” el a

splica. Despues di COVID, e presion a intensifica. Y segun PPA, a uza e debe di pandemia como instrumento di presion y manipulacion politico. “Esaki no ta solamente supervision financiero! Esaki ta influencia riba nos soberania,” Pieters a enfatisa.

## Cambio di posicion: politica sin principio

Den e reunion, PPA a pone tambe un punto politico sensitivo: e cambio drastico di posicion di e partidonan na Aruba. Henter Aruba sa cu AVP fuertemente a indica cu nan ta contra Rijkswet, pero desde formacion di gobierno, a bolter y bira pro Rijkswet. Partido MEP tabata e gobierno cu a firma e famoso ‘bestuurlijk akkoord’ y awe ta contra HOFA.

“Pues e conclusion ta preocupante,” Pieters a bisa. “Politica no



mester wordo guia pa conveniencia, pero pa principio.” Segun PPA, esaki ta muestra con presion externo y dinamica di coalicion ta distorsiona e decisionnan cu ta afecta futuro di pais.

## Aruba no ta un problema financiero mas

Un di e puntonan mas fuerte cu PPA a trece dilanti ta cu Aruba no ta un riesgo financiero, ya cu e schuldquote a baha di 117% te 70%, economia ta muestra crecimiento y nos a registra surplus.

“Si nos ta haciendo bon, pakico insisti riba un Rijkswet?” Pieters a cuestiona. Esaki tabata e pregunta central den e dialogo cu Don Ceder.

Alternativa real: supervision den nos propio ley

PPA NO ta contra supervision. Al contrario. “Nos ta kere den responsabilidad

financiero,” Pieters a aclara. “Pero e supervision mester ta ancla den nos propio Staatsregeling.” Solucion?

Crea un begrotingskamer, cu control fuerte pero local y percura pa transparencia sin perde autonomia. Esaki ta duna Hulanda seguridad y garantia, sin sacrifica e posicion unico di Aruba den Reino.

## Interes: un trato inhusto

Otro punto crucial tabata e interes riba e lening di COVID. Aruba ta paga te 6.9%, mientras otro pais den Reino ta paga alrededor di 3.2%–3.4%. PPA a propone un solucion pragmatico: Baha e rente/interes na nivel comparabel of si ta mantene e 6.9% uza e diferencia (3.4-6.9= 3.5%) pa crea un fondo di inversion pa Aruba.

“Nos ta dispuesto pa paga, pero no pa acepta un trato inhusto,” Pieters a declara.

Un yamada pa union den un Frente Nacional

Un di e mensahenan mas fuerte cu a sali for di e reunion ta e gran necesidad di union.

Don Ceder mes a subraya e importancia pa Aruba presenta union.

“Nos mester bay Den Haag no como partidonan separa, pero como un solo pueblo,” Pieters a enfatisa.

Aruba mester para firme


E prome dia na Den Haag a confirma un cos: E lucha pa proteha Status Aparte ta mas relevante cu nunca. PPA ta mandando y vociferando un mensahe directo: no na HOFA, no na debilitacion di autonomia y si na responsabilidad, pero bou di nos propio leynan. “Aruba no ta contra cooperacion ni supervision financiero,” Pieters a conclui.

“Pero cooperacion no porifica cu nos ta entrega un lucha historico di nos autodeterminacion.”



# AUTORNAN DELNO TROMP Y ELSMARIE BEUKENBOOM DI BONIERO:

Buki di mucha y historia inspirador presenta den encuentro cu Prome Minister



Den un ambiente calido y culturalmente enriquecedor, Prome Minister Mike Eman a ricibi recientemente

bishita special unda a haci entrega di dos publicacion literario cu enfoca riba identidad, desaroyo personal y imaginacion creativo.



Entre e obranan presenta tin Quingo Flamingo y Isla di Lionel, buki di mucha crea pa autornan Boneriano Delno Tromp y Elsmarie Beukenboom. E historia ta relata e aventura di un flamingo curioso cu ta bula for di Boneiro pa descubri otro isla den Caribe. Den su trayecto, e ta bishita Corsou y finalmente Aruba, unda e ta baha den Parke Nacional Arikok.

Na Aruba, Quingo ta topa diferente personahe emblematico di nos naturalesa, incluyendo Shon Choco, Shon Patrishi y Shon Cascabel. Durante su exploracion, e ta pasa pa experiencia di curiosidad, sorpresa

y tambe un momento di susto ora e topa Cascabel, reflehando di un forma relativo e diversidad y caracter unico di fauna local. E historia ta integra elemento di fantasia cu educacion ambiental, resaltando tres espezies cu no ta presente na Boneiro, y promoviendo conciencia entre muchanan riba balor di biodiversidad di Aruba. Adicionalmente, a presenta buki Isla di Lionel cu ta enfoca riba e trayecto di un hoben cu a bay studio den exterior y, despues di su formacion, a regresa Aruba pa realisa su aspiracionnan. E narrativa ta destaca perseverancia, identidad y e decision consciente di bolbe contribui na desaroyo di su pais, un tema cu ta

resona ampliamente den comunidad.

E encuentro entre e autornan, caracteriza como uno ameno y inspirativo, unda a comparti nan pasion pa literatura y storytelling como instrumento pa educacion y formacion personal.

Gobierno di Aruba ta reconoce e importancia di intercambio cultural manera esaki, cu ta contribui na fortalecimiento di identidad nacional/regional, cu e enfoca pa sigui stimula proyecto cu ta conecta educacion, cultura y desaroyo personal como base pa un sociedad mas consiente y resiliente.




# MINISTER DOWERS A REUNI CU FUNDACION GUIA MI: FORTIFICANDO PROTECCION DI NOS MUCHANAN



Diaranson Minister di Husticia, Integracion, Transporte Publico y Energia mr. drs. Arthur Dowers, a sostene un reunion cu Anneke Nicolaas, directora di Fundacion Guia Mi, un institucion di gran balor den nos comunidad cu ta dedica nan trabao na proteccion, guia y bienestar di muchanan y famianan den situacion vulnerabel.

Fundacion Guia Mi ta cumpli un rolesencial como institucion di proteccion di menor, y den cierto caso ta asumi responsabilidad di supervision y voogdij, semper cu e interes di e mucha na prome luga. Durante e reunion, Fundacion Guia Mi a presenta nan retonan na Minister Dowers relaciona cu nan tarea di duna proteccion na muchanan. Ademá, a papia di colaboracion mas estrecho entre gobierno y sector social, cu un enfoque strategico riba crea oportunidad pa desaroyo di cada mucha. Fundacion Guia Mi tin un rol central den supervision y guia di muchanan

den circunstancianan delicado, y nan trabao ta esencial pa mantene estabilidad y siguridad den nos sociedad.

|                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                 |                                                                                                                                                                             |                                                                                |
|-----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-----------------------------------------------------------------------------------------------------------------------------------------------------------------------------|--------------------------------------------------------------------------------|
|  <div>Paardenbaaistraat 10, Oranjestad, Aruba Tel.: (297) 525 - 7555<br/>www.lottoaruba.com<br/>Resultado: Sorteo di Merdia ☀ - April 15, 2026</div>                                                                                                                                                                                                                                                                                                                                                                                                                                                                                                                                                                                                                                                                                                                                                                         |                                                                                                                                                                             |                                                                                |
|  <div>Sorteo # 4947<br/><b>7342</b><br/><b>9965</b><br/><b>6481</b><br/><b>X2</b><br/><div>Sorteo # 4947<br/><b>9356</b><br/><b>X2</b><br/><div>Sorteo # 3003<br/><b>8104</b><br/><div>Sorteo # 4947<br/><b>4219</b><br/><b>Tauro</b><br/><div>Sorteo # 1821<br/><b>239</b><br/><b>X5</b></div></div></div></div></div> |  <div>Sorteo #<br/>0 x Jackpot<br/>0 x Match 4+<br/>0 x Match 4<br/>0 x Afl. 12,00</div> | <div>Joker Letter</div> <div>Proximo Jackpot</div> <div><b>170.000,-</b></div> |
|  <div>Sorteo #<br/>0 x Jackpot<br/>0 x Match 4<br/>0 x Afl. 8,00</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                       | <div>Proximo Jackpot</div> <div><b>97.000,-</b></div>                                                                                                                       |                                                                                |
|  <div>Sorteo #<br/>0 x Jackpot<br/>0 x match 4<br/>0 x Afl. 500,00<br/>0 x Afl. 50,00<br/>0 x Afl. 15,00</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                               | <div>Mega Ball</div> <div>Proximo Jackpot</div> <div><b>875.000,-</b></div>                                                                                                 |                                                                                |
|  <div><b>Afl. 1.375.000,-</b></div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                          |                                                                                                                                                                             |                                                                                |
|  <div>Sorteo #</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                         |                                                                                        |                                                                                |

|                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                  |                                                                                                                                                                               |                                                                                |
|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|-------------------------------------------------------------------------------------------------------------------------------------------------------------------------------|--------------------------------------------------------------------------------|
|  <div>Paardenbaaistraat 10, Oranjestad, Aruba Tel.: (297) 525 - 7555<br/>www.lottoaruba.com<br/>Resultado: Sorteo di Anochi 🌙 - April 15, 2026</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                        |                                                                                                                                                                               |                                                                                |
|  <div>Sorteo # 8823<br/><b>8057</b><br/><b>7072</b><br/><b>3201</b><br/><b>FP</b><br/><div>Sorteo # 7867<br/><b>5441</b><br/><b>X2</b><br/><div>Sorteo # 2572<br/><b>2160</b><br/><div>Sorteo # 6626<br/><b>6321</b><br/><b>Piscis</b><br/><div>Sorteo # 1556<br/><b>315</b><br/><b>X2</b></div></div></div></div></div> |  <div>Sorteo #<br/>0 x Jackpot<br/>0 x Match 4+<br/>0 x Match 4<br/>0 x Afl. 12,00</div> | <div>Joker Letter</div> <div>Proximo Jackpot</div> <div><b>170.000,-</b></div> |
|  <div>Sorteo # 7152<br/>0 x Jackpot<br/>14 x Match 4<br/>316 x Afl. 8,00</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                              | <div>Proximo Jackpot</div> <div><b>97.000,-</b></div>                                                                                                                         |                                                                                |
|  <div>Sorteo # 1861<br/>0 x Jackpot<br/>1 x match 4<br/>23 x Afl. 500,00<br/>268 x Afl. 50,00<br/>321 x Afl. 15,00</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                    | <div>Mega Ball</div> <div>Proximo Jackpot</div> <div><b>875.000,-</b></div>                                                                                                   |                                                                                |
|  <div><b>Afl. 1.375.000,-</b></div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                         |                                                                                                                                                                               |                                                                                |
|  <div>Sorteo #</div>                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                                        |                                                                                          |                                                                                |





**"EN BERDAD, T'E  
HOMBER AKI TA  
E PROFETA CU  
MESTER A BINI NA  
MUNDO!" HUAN  
6,14**

Awe nos ta recorda e milagro dilanti mas di cinco mil hende ora cu Hesus a tuma e pannan y, despues di a gradici Señor, a reparti e pan entre e hendenan y a haci mescos cu e piscanan y tur a come. Hesus no a haci e milagro pa luci, e ta algo mas profundo: movi pa e amor di Dios pa cu e hendenan. Nos tin cu compronde cu ora Hesus haci milagro ta pa fe y puro amor. E multitud tabata sigui Hesus pa nan fe y confiansa den djE. Nan a pasa hopi caminda y tabata tin hamber y sed pa e berdad y e amor di Dios. Nos como cristiannan, tambe mester manifesta e amor di Dios semper y cualkier caminda cu nos ta. Nos tin respet pa nos bisiña y compronde kico nan necesidad ta.

Nos tin cu imita Hesus: yuda mehora e bida di e hendenan. Esaki ta e obra salvador di Dios a traves di nos mannan. Nos por haci milagro si nos tin un curason manera e otronan cu ta comparti, sinti gratitud, confiansa y respet pa otro.

Oracion: Oh Señor, laga nos ta Bo compañero y haci milagro den nos rumannan cu ta permiti nos sirbi tur cu fe y amor. E amor cu lo pusha tur pa ensalza Bo nomber. Amen.

Un cos so mi a roga Señor:  
esey so mi ta t'anhelá cu mi por biba den cas di Señor  
tur dia di mi bida pa contemplá splendor di Señor  
y bishitá su tèmpel  
Salmo 27:4  
Cu dolor na nos curason,  
nos ta participa fayecimento di nos ruman stima



**Maria Coromoto Ruiz,**  
\*07-07-1956 – †31-03-2026

Na nomber di  
**Su mayornan:**  
†Alfredo y †Regina Ruiz-Ridderstaat

**Su rumannan y sobrino(a)nan**  
Filomena y Antonio Geerman-Ruiz y yuinan  
Jose Emmanuel Ruiz y Anna Witsenburg y yuinan  
Alfredo y Jaqueline Ruiz-Trinidad y yuinan

**Su Omonan y tantanan:**  
†Reina Lambertus Ridderstaat, †Hermonica Ridderstaat  
†Joaquin Ridderstaat, †Nemencio y Memita Ridderstaat-Diaz  
†Juan y Gisela Ridderstaat-Maduro, †Andres y †Teresita Ridderstaat-Semeleer  
†Paus y †Ramona Ruiz-Coronel, †Silvania y †Melvin Capello-Ruiz  
**Su primo-y primanan:**  
Editha y †Juan Lopez-Lambertus y nan yui, Gabriela Lopez y Ewald Winklaar y  
**yiunan**  
†Alfred Lambertus y yiuinan, Rosanna Ridderstaat y yiu, Chito Ridderstaat  
**Susan Ridderstaat y yiunan**  
†Maria Altagracia y †Ricardo van der Biezen-Ridderstaat y yiu  
†Juan Carlos Ridderstaat, Annie y Sergio Barros- Ridderstaat  
Alexander Ridderstaat  
Mildred Ridderstaat y Javier Ras y yiuinan, Andresito Ridderstaat  
Jorge Ridderstaat y Mildred Dirksz y yiuinan  
Arminda (Vivi) y Facundo Franken-Ruiz, Alfred Ruiz y May Wong  
Danilo Ruiz y Jesper de Jong, Mariela y Jasper Bruin-Ruiz  
Melvany Capello y yiuinan, Sidney y Gesmeline Capello-Leito

**Demas famia y conocirnan**  
Maria Luisa Dirksz, Jenny, Marcia, Carmencita y Benny Cornelio, Sheila y Peter, Astrid y Kili Tromp-Hoek, Aileen Franken, Martha Maduro y Gerladine Angela-Croes, demas bisiñanan, ex coleganan di DIMP y tur demas amigo- y amiganan y conocirnan  
Famia: Ruiz, Geerman, Trinidad, Witsenburg, Gordon, Lambertus, Lopez, Winklaar, Ras, Capello, Ridderstaat, Barros, Dirksz, Franken, Wong, de Jong, Bruin, Leito y Swaen.  
Gradecimento:  
Dr. Mikkeo Martis, Dr. Sil Kordes, Sra Lola Geerman di WKF, Personal di Oconlogie afdeling

Nos disculpa si den nos tristesa nos por a lubida un of otro famia y amistad

**Nos ta invita pa acto di despedida cual lo tuma lugar ariba diahuebs 16  
april 2026 for di 9or pa 11or di mainta na Pro-Cathedral San Francisco de  
Asis, Oranjestad y despues lo sali bay pa Santana Catolico na Playa.**

Nos ta lamenta cu despues di entierro nos lo no por ricibi bishita di condolencia na cas.



SOPI DI LETRANAN

Baby Shower Sopa de Letras



|   |   |   |   |   |   |   |   |   |   |           |
|---|---|---|---|---|---|---|---|---|---|-----------|
| S | O | T | I | T | A | P | A | Z | Z | ZAPATITOS |
| V | B | E | B | I | T | A | H | G | I | TOALLITA  |
| A | T | I | L | L | A | O | T | O | N | EMBARAZO  |
| Q | N | S | U | A | M | T | N | Z | E | ANTOJOS   |
| P | B | S | O | J | O | T | N | A | N | ABUELOS   |
| S | A | M | A | M | R | V | A | R | A | PELUCHE   |
| E | H | C | U | L | E | P | P | A | U | BIBERON   |
| B | I | B | E | R | O | N | A | B | Y | BEBITA    |
| L | G | Z | A | G | H | A | P | M | Z | AMOR      |
| G | S | O | L | E | U | B | A | E | S | NENA      |
|   |   |   |   |   |   |   |   |   |   | PAPA      |
|   |   |   |   |   |   |   |   |   |   | MAMA      |

SUDOKU

|   |   |   |   |   |   |   |   |   |
|---|---|---|---|---|---|---|---|---|
| 8 |   |   |   |   |   |   |   |   |
|   |   | 3 | 6 |   |   |   |   |   |
|   | 7 |   |   | 9 |   | 2 |   |   |
|   | 5 |   |   |   | 7 |   |   |   |
|   |   |   |   | 4 | 5 | 7 |   |   |
|   |   |   | 1 |   |   |   | 3 |   |
|   |   | 1 |   |   |   |   | 6 | 8 |
|   |   | 8 | 5 |   |   |   | 1 |   |
|   | 9 |   |   |   |   | 4 |   |   |

|   |   |   |   |   |   |   |   |   |
|---|---|---|---|---|---|---|---|---|
|   |   | 9 | 8 |   |   |   | 4 |   |
| 4 |   |   |   | 5 |   |   |   |   |
|   |   |   | 7 | 1 |   |   |   | 9 |
|   |   |   |   |   |   | 8 |   | 1 |
|   | 5 | 8 |   |   |   | 4 | 7 |   |
| 6 |   | 3 |   |   |   |   |   |   |
| 5 |   |   |   | 7 | 1 |   |   |   |
|   |   |   |   | 4 |   |   |   | 2 |
|   | 7 |   |   |   | 9 | 1 |   |   |

|   |   |   |   |   |   |   |   |   |
|---|---|---|---|---|---|---|---|---|
|   |   | 5 | 3 |   |   |   |   |   |
| 8 |   |   |   |   |   |   | 2 |   |
|   | 7 |   |   | 1 |   | 5 |   |   |
| 4 |   |   |   |   | 5 | 3 |   |   |
|   | 1 |   |   | 7 |   |   |   | 6 |
|   |   | 3 | 2 |   |   |   | 8 |   |
|   | 6 |   | 5 |   |   |   |   | 9 |
|   |   | 4 |   |   |   |   | 3 |   |
|   |   |   |   |   | 9 | 7 |   |   |

Oracion di dia

Un dia fructifero y cu e luz di Cristo por briya den cada un di nos

" ... Pasobra tur hende cu halsa nan mes, lo keda humilia, ma esun cu humilia su mes, lo keda halsa". Lucas 18,14

Awe nos ta lesa e importancia di humildad y reconece nos faltanan. Nos por ta manera e fariseo husgando otro y halsando su mes of manera e cobrado di belasting ta reconece su falta y su necesidad di compasion. Cu humildad nos ta sirbi otro sin busca recompensa; scucha mas y papia menos, na balora e otronan pa loke nan ta y no pa loke nan tin of ta aparenta di ta. Reflexionando continuamente ta yuda evita na cay den orguyo y na mantene nos mirada fiho den e mision cu Señor a confia nos. Biba cu berdadero humildad ta nifica rechasa e mascaradanan cu hopi biaha nos ta pone pa impresiona of pa competi cu otro. No biba un bida superficial of di falsedad, sea un luz pa mundo unda e luz di Cristo ta briya den bo. Loke ta importa no ta con otronan ta mira nos, sino con Dios ta mira nos. Ser bo mes y cu humildad ta acerca nos na e berdadero esencia di nos fe y esey ta haci nos un instrumento den e man di Dios.

Oracion : Señor Hesus, haci mi curason pareu na bo curason. Manso y humilde y obedecido na bo Santa boluntad.

Amen.



# Parlamentario Shailiny Tromp-Lee: AVP TA MALINFORMA PUEBLO PA PROBECHO POLITICO; RAPPORT DI ARA TA UN LES DI CRISIS, NO PRUEBA DI CORUPCION

Parlamentario Drs. Shailiny Tromp-Lee ta reacciona riba e intentonan irresponsabel di fraccion di AVP pa crea un scenario di duda y malinforma comunidad rond di e Jaarrekening 2020.

Tromp-Lee ta condena e narrativa falso di e fraccion aki, mustrand cu nan ta uza un rapport tecnico di Algemene Rekenkamer (ARA) pa gaña pueblo cu insinuacionnan di corrupcion cu simplemente no ta existi.

## Malinformacion pa Probecho Politico

Tromp-Lee a clarifica cu e rapport di ARA ta señala deficiencianan administrativo cu a surgi den un tempo di catastrofe mundial. Na ningun momento e rapport ta papia di corrupcion. "Insinua esaki ta un acto di desesperacion politico di AVP pa purba mancha un liderazgo cu a scoge pa salba bida prome cu burocracia," Tromp-Lee a

declara. E Parlamentario ta enfatisa cu AVP ta uza terminonan manera "ilegal" pa spanta y crea duda den pueblo, lubidando cu na 2020 e prioridad tabata pa 25.000 famia no muri di hamber y pa nos pais mantene cabes riba awa.

Sugerencianan di ARA pa contra-aresta malinformacion

Parlamentario Tromp-Lee ta enfatisa cu, en bes di keda biba den pasado buscando culpa, e enfoke mester ta riba e conclusionnan constructivo di ARA. ARA mes ta indica cu e les di mas grandi cu e crisis a laga atras ta e urgencia pa Aruba conta cu un plan di crisis coherente y un sistema digital unifica. Parlamentario Tromp-Lee ta clarifica, cu si nos sistema administrativo tabata debil, ta netamente pasobra nos a hereda un aparato gubernamental sin inversion den tecnologia y financieramente debilita



pa e MEGA debe cu AVP a laga atras. Na lugar di crea duda innecesario, AVP mester splica e pueblo pakico nan no a fortifica nos institucionnan ni inverti den digitalisacion ora nan tabata den gobierno.

## Asunto resolvi y legalisa na 2022

Tromp-Lee a recorda comunidad cu e falta di base legal temporal cu ARA a constata ya a wordo legalisa pa Parlamento na

aña 2022. "E discusion legal aki ta un capitulo sera. Nos a formalisa e yudansa, nos a duna cuenta y nos a legalisa e sosten di FASE añanan pasa." Tromp-Lee ta aclara. E fraccion di AVP ta persisti den un retorica riba asuntonan cu ya a keda legalmente resolvi, esaki ta un indicacion di nan falta di vision pa e futuro di nos pais. Nan unico strategia ta crea duda caminda tin transparencia.

## Vision pa Futuro

Parlamentario Tromp-Lee ta reitera cu su enfoke ta keda firme riba e mehoracion di control digital y e preparacion di leynan di emergencia. El a enfatisa cu den e reunion di dia 4 di juli, a aproba e base legal necesario pa asina no permiti e criminalisacion di e yudansa cu a mantene Aruba stabiel den su pio momento. "Liderazgo den crisis ta nifica curashi pa actua, no sconde tras di burocracia mientras pueblo ta sufri," Tromp-Lee a conclui.

# CAMBIA PERSPECTIVA TOCANTE OBESIDAD: SA BO NUMBER Y MIDI BO PESO





# DIOS TA PROHIBI TUR RELACION SEXUAL PAFOR DI SACRAMENTO DI MATRIMONIO

E diabel ta purba cambia e moda di biba di hende, den e relacion sexual prohibi. E mundo por cambia, pero e palabranan di Dios nunca no ta cambia. Gobiernonan di mundo por pasa leynan cu ta contra di e palabranan di Dios, pero Dios ta bisa den Bijbel, Bijbel Malakias 3: 6 : “Ami Senjor, Mi no ta cambia.” Bosonan no sa, cu tur relacionnan sexual pafo di e Sacramento di Matrimonio, ta un relacion sexual prohibi pa fierno. Den e di 9 Mandamento di Dios ta bisa: “Lo bo no comete e pika di fornicacion, fornicacion ta e relacion sexual prohibi pa Dios, esta : Na esnan cu ta biba companja, na esnan cu ta casa pa Raad so, e prostitutanan y na e libertinahe sexualnan di tur clase. Bijbel 1 Corinthionan 6: 18 ta bisa: “Abstene boso di relacion sexualnan prohibi. Tur otro pika cu hende ta comete, ta tuma lugar pafo di su curpa.

Ma esnan cu ta haci relacion sexualnan prohibi, ta peka contra di su mes curpa.” Bijbel 1 Corinthionan 7: 2 ta bisa: “Ma, si ta pa e tentacion di haci relacion sexual pafo di matrimonio, anto ta mihor cu cada homber tin su mes esposa y cada muher tin su mes esposo.” Bijbel Hebreonan 13: 4 ta bisa: “Tur hende mester respeta matrimonio den tur aspectonan y mantene e fieldad den e relacionnan entre esposo y esposa. Dios ta castiga na esnan cu tin relacionnan sexual prohibi y na esnan cu ta comete adulterio.” Bijbel 1 Tessalonicensenan 4: 2 – 5 ta bisa: “Boso conoce e instruccionnan cu nos a duna boso riba autoridad di Senjor

Hesus. E boluntad di Dios ta, pa boso bira santonan y pa boso no tin relacionnan sexual pafo di matrimonio.

Cu cada uno sabi di busca un esposa den santidad y respet, sin laga e mal deseonan desvia boso, manera sa haci den e pueblonan cu no conoce Dios.” Bijbel Colonsensenan 3: 5 y 6 ta bisa: “P’esey, mata tur loke ta keda di e mundo aki den boso, esta : Inmoralidad sexual, impuresa, mal pasion, mal deseonan y avaricia cu ta igual na idolatria. Pa motibo di e pikanan asina, Dios ta rabia y ta castiga na esnan cu no ta obedecel’E.”

Bijbel 1 Corinthionan 6 : 19 y 20 ta bisa: “Bosonan sabi esey, cu boso curpa ta tempel di Spirito Santo, kende ta biba den boso, kende boso a ricibi di Dios. Boso no ta di boso mes, boso ta cumpra y e prijs ta paga. Glorifica Dios anto den boso curpa.” Bijbel 1 Corinthionan 6 : 9 y 10 ta bisa : “Boso no sabi, cu e inhustonan lo no drenta den e Reino di Dios? No ganja boso mes, na esnan den relacion sexual prohibi, na e sirbidornan di diosnan falso, na esnan den adulterio, na e homosexualnan di tur clase, na e ladronnan, na e alcoholiconan, na e blasfemadornan, na esnan golos pa plaka, na e abusadornan, ningun di nan lo no tin parti den e Reino di Dios.” Relacion sexual mester sosode solamente den e casamento den Sacramento di Matrimonio pa Dios, pa bo por ta salba.

Bijbel Marko 10 : 6-9 ta bisa : “Ma na principio tempo di creacion, Dios a crea nan homber y muher. P’esey e homber lo bandona su tata y su mama, pa e uni cu su muher y e dosnan aki lo bira un solo curpa. P’esey, loke cu Dios a uni, hende no ta permiti di separa.” Esaki ta e Sacramento di Matrimonio den Misa, na unda Dios ta uni e pareha den un solo curpa, pa medio di un sacerdote. Den e Sacramento di Matrimonio aki, Dios ta uni e pareha den nan bida sexual y den e un solo curpa aki, e muher no ta donjo di su mes curpa mas, sino su esposo, tambe e homber no ta donjo di su mes curpa mas, sino su senjora, lesa Bijbel 1 Corinthionan 7 : 4, loke Dios ta bisa di e pareha casa: “No ta e muher ta donjo di su mes curpa, sino su esposo. Tampoko no ta e homber ta donjo di su mes curpa, ma su senjora.” Pesey e pareha ta keda casa te na morto y Dios no ta reconoce divorcio, pasobra e matrimonio ta un pacto di union di Dios e ta. Si e pareha a divorcia toch, anto nan mester laga e caminda habri y no mete cu ningun otro hende den nan bida. Pasobra e pika di adulterio, ta un caminda pa fierno despues di morto.

Seferino Tromp

Koyari 13-D tel. 5931157 / 5870048

Id. 57.11.22.40

Email: etajuni@yahoo.com



## Declaracion Oficial

Oranjestad, Aruba – 14 di April 2026

Fraccion AVP a tuma nota di e sentencia pronuncia awe den e caso Avestruz y cu ta involucra Sr. Benny Sevinger. Nos ta reconoce cu Aruba ta un Estado di Derecho, unda e sistema hudicial tin su propio proceso independiente y cu e sistema mester haya espacio pa haci su trabou.

Den e contexto aki, fraccion AVP kier expresa nan sincero empatia y apoyo na nan colega, parlamentario Stephany Sevinger, y na tur su famia durante e periodo dificil aki.

Nos ta respeta su privacidad y dignidad mientras nan ta procesa e situacion, y ta spera otronan haci mescos.

Fraccion AVP ta reafirma su compromiso cu

transparencia, integridad y bon gobernacion.

Na mes tempo, nos ta mira cu interes cu e autoridadnan hudicial continua y acelera e investigacion y tratamiento di e diferente casonan di presunto corrupcion cu ainda ta pendiente, pa asina fortalece confianza di nos pueblo den e Estado di Derecho.

